

BERIMANLAH KAMU KEPADA ALLAH!

Penulis rencana ini ialah al-Fadhil Tuan Abdul Jalil Hassan Naib

Mufti Kerajaan Johor yang telah berkelulusan di dalam Azhar dan terkenal kepada alam

bacaan Melayu telah bermurah hati menulis suatu makalah agama yang kita rasa

patut diperhati dan diselidiki dengan saksama terutamanya oleh belia-belia kita

yang sedang terpengaruh oleh faham-faham yang menafikan adanya Tuhan Rabbul Jalil.

Mudah-mudahan makalah ini ada faedahnya kepada umum bagi mengingati orang-orang kita

yang tersesat jalan supaya berbalik ke pangkalnya dan yang belum masuk supaya

beringat jangan terkena. – Pengarang.



(Oleh Abdul Jalil Hassan)

Dasar didikan ajaran agama yang terutama adalah terdiri di atas iman percaya kepada Allah, dan agama yang diterima ajarannya iaitu agama yang dibawa oleh Rasul-rasul Allah, yang berasaskan tauhid, yakni percaya kepada Allah. Firman Allah Taala di dalam Quran (*Inna al-din 'indallahi al-Islam*) - Imran ayat 18 – Ertinya bahawa adalah agama yang direhdai Allah iaitu agama Islam, yakni agama yang dibawa oleh Rasul-rasul yang berdiri di atas tauhid mengesakan Allah, iman percaya kepada Allah.

Daripada makna tujuan Quran itu fahamlah kita, bahawa orang-orang Islam adalah mengaku agama-agama lain yang dibawa oleh Rasul-rasul, seperti agama yang dibawa oleh Saidina Musa dan Saidina Isa – alaihi wassalam, yang terdiri di atas iman percayakan Allah, percayakan rasul-rasul dan ajaran-ajarannya.

Dan lagi Allah Subhana wa Taala telah menggelarkan orang yang beriman percayakan Allah itu orang Islam. Firmannya di dalam Quran “*fā lamma 'ahsana 'isa minhum al-kufr, qala man ansari ila Allah, qala al-hawariyyuna nahnu 'ansarullah amanna billlah wa ashhad bi anna muslimun*” Imran 51 – Ertinya tatkala nabi Allah Isa

tahu daripada kaumnya ada yang ingkar dan hendak membunuhnya akan dia, berkatalah nabi Allah Isa itu, siapakah penolongku kepada jalan Allah supaya menyiaran agamanya? Telah berkata sahabat-sahabat nabi Allah Isa yang setia ikhlas, kami penolong agama Allah, kami telah beriman percayakan Allah, saksikan olehmu ya Nabi Allah Isa, bahawa sesungguhnya kami adalah orang Islam.

Daripada ayat-ayat ini difaham, adalah pengikut nabi Allah Isa itu orang-orang Islam, kerana mereka itu percayakan Allah dan percayakan agama yang dibawa oleh Saidina Isa Rasul Allah. Dari itu nyatalah tiap-tiap orang yang beriman percayakan Allah, percayakan Rasul-rasul Allah dan ajaran mereka, ianya orang Islam.

Orang yang membahas akan ajaran-ajaran Quran dan didikan agama Islam dengan halus, akan terdapat di dalam ayat-ayat Quran, tidak sunyi daripada menyeru dan mengajak manusia supaya beriman percayakan Allah dan percayakan rasul-rasulnya, menegah daripada menyekutukan Dia dengan sesuatu apa pun daripada makhluk.

Adapun hikmah didikan agama di atas dasar percayakan Allah itu ada meliputi segala tujuan bagi kebahagiaan

hidup manusia dunia akhirat, kerana iman percayakan Allah itu punca segala kebajikan bagi diri seseorang, dan bagi pergaulan manusia, menarik manusia kepada persahabatan, perdamaian, tolong-menolong, belas kasihan di antara satu sama lain, dan orang yang tiada beriman kepada Allah, yakni tiada beragama tidak mempunyai panduan yang kuat, kerana jika ia berpandu hanya kepada akalnya maka akal itu tiada boleh sempurna mengetahui perkara-perkara yang ghaib, dan terkadang-kadang akal itu salah pada menghukum sesuatu, dan terkadang-kadang akal dikalahkan oleh nafsu, tiada takut kepada aturan atau undang-undang negeri, melakukan perbuatan menurut sehendak hatinya, dengan tiada menaruh takut kepada sesiapa, tiada gentar, membunuh, menzalim, merampas, menyiksa, dan memperhambakan orang-orang lain, yang menerbitkan perselisihan dan perkelahian dan peperangan sesama manusia, sengsara dan huru-hara dunia.

Iman percayakan Allah itu jika diselidiki dengan halus adalah ia suatu takrif rupa bangsa manusia, lain daripada takrif rupa bangsa yang berdasarkan warna kulit, atau bahasa, atau adat, atau negeri, atau maslahat. Sebab takrif rupa bangsa yang berdasarkan iman percaya kepada Allah dan Rasul-rasul, itu sangat luas, meliputi bermacam-macam bangsa manusia yang berlainan kulit, bahasa, adat, negeri, dan maslahat. Tiada menggalang Timur dan Barat bersatu, boleh menyatukan segala bangsa di atas muka bumi ini.

Tetapi sebaliknya jika takrif rupa bangsa berdasar di atas jenis manusia, atau di atas dasar berlainan-berlainan kulit, atau rupa atau bahasa atau adat atau maslahat adalah sempit dan tidak dapat sesuatu dengan peredaran masa dan perubahan dunia, dan tidak akan tercapai persatuan atau persahabatan yang besar di antara manusia. Dan tidak akan dapat memerbaiki ehwal kemajuan dunia dan menyekat daripada berbangkit peperangan yang menjahamkan bermillion-million manusia.

Oleh sebab agama Islam agama Allah yang akhir dibawa oleh

Rasulullah bersesuaian sepanjang masa dan ke mana-mana tempat dan agama Islam itu untuk sekalian manusia maka Allah Taala menjadikan rupa bangsa bukan memandang kepada warna kulit, atau rupa muka, atau berlainan bahasa, atau adat tetapi memandang kepada iman percayakan Allah dan Rasul-rasul-Nya (*Innammal mukminun al-ikhwatun faaslahu baina akhawaikum*) ertiinya hanya sesungguhnya orang-orang yang beriman itu bersaudara maka hendaklah kamu islah perbaiki di antara saudara-saudara kamu.

Daripada ayat ini nyatalah didikan agama itu tidak memandang kepada jenis bangsa, warna kulit, rupa muka, adat, kaya, miskin, bangsawan atau golongan rakyat mereka itu sekalian pada pandangan agama bersaudara jika sekaliannya beriman percayakan Allah dan Rasul-rasul yang membawa ajaran Allah.

Dengan tertanam persaudaraan di dalam tiap-tiap hati manusia adalah menarik tiap-tiap manusia daripada berusaha kasihkan orang lain seperti ia kasihkan dirinya, dan sentiasa menaruh insaf dan timbang rasa kepada orang lain. Rasa persaudaraan di antara manusia menarik tiap-tiap seorang kepada adil tiada menzalim, tiada menipu, tiada memperhamba, tiada bersifat jahat dengan demikian itu terjadilah di antara manusia persahabatan yang setia ikhlas tiada khianat-mengkhianat, masing-masing bekerja untuk kemaslahatan manusia.

Dan lagi ajaran agama itu menarik kabilah-kabilah dan alsa-alsa hingga agama kepada persatuan. Firman Allah Taala di dalam Quran (*Qulu amanna billahi wa ma unzila ilayna wa ma unzila ila ibrahim wa isma'il wa ishaq wa ya'qub wa al-asbat wa ma utiya Musa wa 'isa wa ma utiya al-nabiyyun min rabbijim la nufarriqu bayna ahadin wa nahnu lahu Muslimun*) Ertinya hendaklah kamu orang-orang Mukmin berkata: Kami telah beriman percaya kepada Allah, dan barang yang diturunkan-Nya kepada kami (Quran) dan barang yang diturunkan kepada nabi Ibrahim (suhuf buku-buku) dan kepada Ismail, Ishak, Ya'kub dan putera-puteranya. Dan kami telah beriman percaya kepada barang yang dikurniakan

kepada nabi Musa (kitab Taurat) dan dikurniakan kepada Nabi Isa (kitab Injil) dan barang yang dikurniakan kepada Nabi-nabi daripada Tuhan akan kitab-kitab. Kami tidak membeza-bezakan di antara seorang daripada seorang Nabi-nabi. Bahawa kami kepada tiap-tiap seorang Nabi itu menjunjung percaya.

Itulah sebahagian daripada ajaran didikan Islam dan tujuannya. Dari itu agama Islam menghormati gereja-gereja, dan iktikad-iktikad orang-orang Kristian dan Yahudi. Dan agama Islam membenarkan orang-orang Islam berjuang kerana mempertahankan kebebasan iktikad orang-orang Kristian dan Yahudi yang telah membuat *treaty* perjanjian dengan orang-orang Islam.

Manusia yang percayakan Allah mengetahui perhubungan dirinya dengan Allah dan perhubungan dirinya dengan makhluk yang lain. Maka perhubungan manusia dengan Allah dan perhubungan sesama manusia itu adalah perhubungan yang berkekalan memandu manusia kepada kebijikan dan kebahagian hidup. Sekiranya terupa pada kita bahawa sekalian manusia beragama yakni beriman menjalankan kewajipan menurut ajaran agama Allah, nescaya terupa pada kita boleh pergaulan manusia di dalam dunia dengan tidak berkerajaan iaitu memadai dengan kerajaan iman yang menguasai hati manusia kerana iman yang bersih di dalam hati itu punca kebijikan menjauhkan kejahatan dan sentiasa manusia teringat akan Allah dihadapan yang akan menyodal dan menghukum akan dia dibelakang hari kelak.

Pada masa ini banyak orang-orang bertanya bagaimana hal dunia sekarang sangat buruk huru-hara tiada aman sentosa. Jawapan Rasulullah salaLlah wasallam bersabda, demi Allah tiada beriman, demi Allah tiada beriman, demi Allah tiada beriman (tiga kali) Siapa ya Rasulullah? Kata seorang sahabat yang mendengar sabda Rasulullah itu. Kata Rasulullah: Orang yang tiada aman daripada kejahatan dan kezaliman jirannya.

Daripada hadis ini menunjukkan huru-hara dan sengsara

dunia pada hari ini kerana kebanyakan manusia tiada beriman kepada Allah, jadilah tidak aman orang Kristian atau Yahudi atau Muslim atau Majusi atau Buddha Timur dan Barat daripada kejahatan atau kezaliman jirannya. Lihat pada hari ini tiap-tiap bangsa cemburu kepada bangsa yang lain masing-masing tiada aman daripada terkena ceroboh oleh jirannya.

Kacau bilau huru-hara peperangan sengsara manusia di seluruh dunia akan terus berkekalan sehingga manusia beragama, beriman kepada Allah dengan kuat menakluk hati dan hawa nafsu manusia. Pada ketika itu sekalian manusia barulah mendapat kesenangan, aman hidup di dalam persaudaraan, persahabatan, makmur sentosa, jauh daripada kejahatan dan ketakutan.

Saya berseru kepada sekalian marilah kita berpegang kepada ajaran agama Allah, percayakan Allah, berjalan di atas ajaran Allah, mudah-mudahan kita selamat hidup bahagia.

KALAU ISTERI TUAN MENGANDUNG...

Kalau isteri tuan mengandung, jangan lupa ubat beranak "Cap Kambing Gurun" dengan menggunakan ubat ini tak payah berdiang - tak payah bersali. Harganya \$12.50. bersih pos pesan kepada:-

YAHYA ARIFF

**37, JALAN KANGSAR,
KUALA KANGSAR.**